

四庫全書

史部

欽定四庫全書

史部

建炎以來繫年要錄卷一百三十二

詳校官侍讀學士

臣陸伯焜

侍讀

臣

孫球覆勘

謄錄監生

臣范翔集

謄錄監生

臣陳長春

欽定四庫全書

建炎以來繫年要錄卷一百二十二

宋 李心傳 撰

紹興八年九月

按是月甲申朔

丁亥侍御史蕭振言近除發運

使令糴米以待闕用其價雖隨時低昂當使官價高於民間仍不加耗及即時支錢則有以助國寬民詔從之振又言古之賢將皆協力以成功今陛下舉付之諸將使分屯近甸此係社稷之安危攻之與守全在諸將協

力昔何充所謂將賢則中原可定勢弱則社稷同憂蓋
事同者忌功同者忌賞自古有之望明詔諸將俾首
尾相應唇齒相依庶幾人人協謀大功克舉也是日振
又劾叅知政事劉大中身為大臣而不以孝聞於中外
乞賜罷斥疏留中不下振本趙鼎所薦後以秦檜引入
臺其劾大中蓋以搖鼎也

趙鼎事實云初監察御史蕭振力求外補且托其鄉人吳

表臣薛徽言為請甚切鼎從之遂除郡而去及秦檜拜
相一名即來始振以親年七十求去至是不復以親為
辭尋除南康是必有薦為鷹犬者也未踰月論劉大中
至三章不已鼎謂意不在大中行且及臣矣振去年十

二月除浙西憲
此云除郡小誤

戊子尚書禮部員外郎方庭實考功員外郎鄭剛中並
為監察御史

己丑起復親衛大夫利州觀察使沿海制置副使馬擴
罷為荆湖南路馬步軍副總管時和議將成大臣忌言
兵事擴逡巡求退許之

徐夢莘北盟會編載擴
此除在明年三月恐誤

庚寅給事中兼史館修撰勾濤充徽猷閣待制知池州
殿中侍御史張戒論濤陰附張浚四川監司守倖多出

其門及浚敗事又顯立同異反覆無耻如何掄不端宰
執畏與言初不敢擬而濤攘臂自任欲引躋禁從若不
逐去則濤之植黨不特一掄而已疏留中不出濤聞求
去章四上乃有是命上遣內侍諭令入對奏事踰八刻
濤言戒擊臣趙鼎意也因力詆鼎結臺諫與諸將上頗

以為然

成都丁記景山遷給事中繳駁不避權貴王庶
除樞密胡世將制置四川皆濤所引一日太上

親書金閣清溪四大字以賜又面諭當以卿為相王庶
仍佐卿西府因為時宰所忌屬言路彈擊景山濤字也
今附此仍當
以他書參考

太常少卿蘓符守起居郎仍兼資善堂

贊讀 中書門下省檢正諸房公事薛徽言守起居舍

人 直顯謨閣知掌州劉一止試秘書少監 直龍圖

閣知撫州石公揆罷時江西提點刑獄公事趙渙至部

半年而移獄四十餘處殿中侍御史張戒論公揆病廢

全不任事渙銳意按察而不能安詳過猶不及乞委宣

諭官李杲究實乃黜陟之後杲奏公揆貪殘而渙偏見

自任詔渙奉祠而公揆奪職

十一月癸未公揆落職庚子渙主管台州崇道觀理

作自

潮州進士夏侯旻上書論海陽令柯權自醫學

入官其不法凡十二事詔憲臣究實以聞

甲午史館上續修哲宗實錄 左迪功郎樊光遠為秘

書省正字

丙申詔知桐城縣魏持已降轉官指揮勿行以御史張
戒論其營田殃民也持本張宗元所薦至是代還入對

故戒論之

事祖在去年
八月丙申

己亥尚書兵部員外郎王次翁遷吏部員外郎 太常

丞王居修為駕部員外郎 大理寺丞丁則為工部員

外郎 秘書著作郎兼史館校勘張嶠左朝奉郎林叔
豹並為福建路轉運判官何掄既以簽貼神錄得罪嶠
不自安亦求去故有是命 尚書禮部員外郎李良臣

知簡州張浚既得罪蜀士相繼外補惟勾龍如淵施庭
堅擢用 秘書著作佐郎胡珵為著作郎時左奉議郎

喻樛免喪趙鼎奏以著作郎召給事中張致遠獨袖堂
劄還之除著作又還之除正字復還之乃已鼎忿曰差

除簿當送後省耳

此以張戒默記修入秘書省題名樛
紹興六年七月以正字丁憂當是十

月一日從吉今因著作有闕權附此當考

左奉議郎楊椿為秘書省校書

郎椿彭山人舉進士禮部第一累官州縣用趙鼎薦召對椿勸上行仁義建學校收人材擇將帥去姦吏卹民力凡二十餘事遂有是除

庚子武經大夫閣門宣贊舍人知襄陽府武糾進秩一等用岳飛請也

辛丑輔臣奏以武功大夫王默知均州武功大夫康州刺史邢舜舉知光州上曰今日邊壘內則撫綏外則斥

堠二大事未易得人宜精擇之

壬寅左迪功郎温州州學教授葉絀上書請興太學其說以為今駐蹕東南百司備具何獨於太學而遲疑且養士五百人不過費一觀察使之月俸又言漢光武起於河朔五年而興太學晉元帝興於江左一年而興太學皆未嘗以恢復為辭以饋餉為解誠以國家之大體在此雖甚空惚不可緩也事下禮部既而右諫議大夫李誼言今若盡如元豐養士之數則軍食方急固所未

暇若止以十分之一二為率則規模削弱又非天子建學之體况宗廟社稷俱未營建而遽議三雍之事豈不失先後之序望侯回蹕汴京或定都他所然後推行從之

乙巳上諭大臣曰近張戒有章疏論備邊當以和為表以備為裏以戰為不得已此極至之論也趙鼎等言當

力守此議

此據日歷蓋戒本鼎客故主守日歷又言王庶與趙鼎等亦以此說為然當力守此議按

庶所奏每病趙鼎劉大中持兩端不應自叛其說臣嘗細考日歷紹興七年八月所載和議本末凡遣使議論

悉是趙鼎所奏七年十二月丙子上曰金人能從朕所求其餘一切非所校鼎曰仰見陛下孝心焦勞檜以屈辱為憤八年六月己酉上曰館待之禮宜稍優厚鼎曰若用兵不知所費多少八年六月戊辰范同申金使已到常州臣見人主卑屈懷憤憤之心此人臣之忠也十二月戊午秦檜劄子乞遣官往前路與金使計議使名未正當改江南為宋詔諭為國信據此則屈已之事皆鼎贊成之檜實無預天下後世果可欺哉臣詳考其故蓋紹興十二年以前日歷皆成於檜子熈之手張孝祥嘗乞改之如言王庶當力守此議恐亦近誣今削庶名庶不失實

徽猷閣待制提舉江州太平觀趙開落職初開被召未行乃錄進舊所為軍務機密三事其一謂蜀與荆渚為根本之地朝廷措置在所當先其二謂兵視國

勢為彊弱蜀之民未蘓其勢未可輕動乞速止蜀關大將牽制之謀以除根本之禍復近關梁洋階成鳳五郡之稅賦使其民皆歸業無殺傷秦鞏偽地之民使民有僕后之心則國勢強而兵自強其三謂招懷歸業之民當罷官營田專用張全義治河南故事其效可見於期月會張浚得罪開亦乞奉祠今年二月至是殿中侍御史張戒論遠方壅蔽之患且言臣頃在蜀中事皆目覩大抵張浚欲之而趙開與之張浚惡之而趙開和之二人罪

惡四川疾苦朝廷不盡知也壅蔽之害一至於此開之
罪狀陛下既已灼知自浚敗以來開獨未嘗被責端居
自若至今為待制伏望聖慈特加貶竄少謝蜀民故有
是命

丁未左金紫光祿大夫尚書左僕射同中書門下平章
事監修國史趙鼎遷特進以哲宗實錄成書也中書舍
人兼直學士院呂本中草制有曰謂合晉楚之成不若
尊王而賤霸謂散牛李之黨未如明是而去非惟爾一

心與予同德右僕射秦檜深恨之左朝奉大夫段拂

知大宗正丞拂江寧人也

戊申宰執言自時多艱朝廷思屈羣策以濟庶務緣此
法度多有改易上因曰經久之制不可輕議古者利不
百不變法卿等宜以蕭規曹隨為心何憂不治

壬子上諭輔臣曰昨日浙東漕梁澤民奏今秋糴買事
朕嘗諭以錢給之於民宜戒減尅穀輸之於倉無取羨
餘則公私兩便糴數雖多亦恐無害時已命發運使程

邁專掌和糴故上訓及之

癸丑復制皮剥所以掌鬻官私倒斃牛馬之事其可為
軍器之用者撥赴本所餘入內藏歲為錢二千四百餘
緡

是秋金人徙知許州李成知冀州徙知拱州鄺瓊知博
州悉起京畿陝右係官金銀錢穀轉易北去蓋將有割
地之意也劉豫之未廢也偽麟府路經畧使折可求因
事至雲中左監軍薩里罕密諭以廢豫立可求之意及

是左副元帥魯王昌有割地歸朝廷之議薩里罕恐可

求失望生變因其來見置酒醖之可求歸卒于路

此據張匯

節要及兩國編年修入熊克小歷附折可求之死於去年十一月恐太早

冬十月

按是月甲寅朔

丙辰尚書右僕射提舉詳定一司勅令

秦檜上紹興重脩祿秩勅令格及申明看詳八百十卷

右朝奉大夫主管襲慶府仙源縣太極觀邵博賜同

進士出身除秘書省校書郎博奉祠居犍為以趙鼎薦

得召對上諭曰知卿能文大臣亦多言卿能文者明日

顧二相曰邵博不止劄子好詔言皆成文乃詔博祖父

雍道德學術為萬世師父伯溫經明行潔博趣操文詞

不忝祖父故有是命

此指揮以會要修入日歷無之

時博病新起上又

命近臣往問賜以禁中金嬰神丹

何麟撰博墓誌稱上顧二相除校書郎可

不試按此時校書郎亦多不試非但博一人也

丁巳參知政事劉大中充資政殿學士知處州初侍御

史蕭振劾大中與父不睦人所共知平日分爨而食異

屋而居頃自官所歸單騎省父相值於門不交一語而

去及為執政乃建議民間生男女官支錢五貫欲邀一時姑息之譽而不恤國用如此去年其父病危棺櫬已具其家遣書報之大中久不答蓋待除命爾大中取異姓之子為長子不與婚宦其子積憤所致遂失心一日欲剗刃於大中賴羣卒解救而止大中所以治家者如此何以為國所以事父者如此何以事君伏望明正典刑以厚風俗又論大中選調改官本因童貫詭秘刻薄衆所指目疏三上大中乃求去遂有是命

朱勝非秀水間居錄云劉

大中素不養父未嘗同居與父久別或責其不省勉強一詣見於門首再拜立談頃刻而退大中為趙鼎黨魁驟遷禮部尚書鼎許以叅政父居處州家信至報其父病不知人已具棺斂大中匿其書鼎力薦果叅大政已而父病間亦不問也其子不平操刀逐大中欲殺之衆救獲免事頗喧傳因罷政天下聞而惡之按勝非所云即振章疏中語然大中在朝中其父歷官州縣故當不同居劾疏所言未必一一皆實更須叅考

左

宣教郎朱翌為秘書省正字

戊午左朝奉郎提點洪州玉隆觀林季仲知婺州

辛酉湖北京西宣撫使岳飛言續收到偽知鎮淮軍胡

清等官兵千一百八人詔歸正官並補正

甲子詔自今從官上殿今次臺諫在面對官之上

乙丑中書舍人兼侍講勾龍如淵兼直學士院

丁卯侍御史蕭振言朝廷支降見緡令經制司糴米而發運使程邁一例拋與諸州則諸州不免拋下諸縣科之百姓即非創司寬民之本意宜令官自置糴場從之右諫議大夫李誼嘗言祖宗時發運所領乃轉輸東南之粟以實中都又制茶鹽香礬百貨之利今皆所不及惟是給以本錢使之糴買然復興一司豈專為此哉如

營田經理之制市易懋遷之法又州縣錢物之陷無所
拘賦歛之橫無所考監司廢格詔條漫不加省宜有稽
考臣願俾總六路而調其盈虛內與戶部相為表裏則
劉晏之策可展而不為虛文不然則糴買一事自可責
之諸路漕臣何必創此司哉望下臣之說於三省講而
行之

辛未上諭大臣曰江西盜賊在朝廷可治者三一擇帥
憲以厭服其心二任守令以勸課其業三蠲科役以優

給其力如此尚或為盜朕未之間也於是右諫議大夫
李誼言漢光武時盜賊羣起則慎擇人材以臨千里如
潁川則七年以寇恂為守九年以郭伋為守故卒能掃
清以知其所本故也今盜賊之處在江西則虔吉筠南
安在廣東則潮梅循惠南雄在閩則汀在湖則郴此數
郡之守未有能設方畧息盜賊以安民者迂儒不才往
往皆是願詔三省科條其人如不任職即選強明之吏
以代之庶以分陛下南顧之憂焉

壬申皇叔登州防禦使知西外宗正事士会同知大宗正事

甲戌特進尚書左僕射同中書門下平章事兼樞密使
趙鼎罷為檢校少傅奉國軍節度使兩浙東路安撫制
置大使兼知紹興府初侍御史蕭振既擊劉大中謂人
曰如趙丞相不必論蓋欲其自為去就也時傳語紛紛
今日曰趙丞相乞去矣明日曰趙丞相般上船矣蓋秦
檜之黨以此撼之鼎猶未深覺其容敕令所刪定官方

疇以書勸之曰見幾而作大易格言當斷不斷古人深戒鼎乃引疾乞免殿中侍御史張戒上疏乞留鼎不則

置之經筵

戒奏疏全文見十一月巳丑

時檜力勸上屈巳議和鼎持

不可繇是卒罷

林泉野記云王倫自金還敵復遣人來議和右相秦檜請遂成之鼎爭不從乞

罷乃以檢校少傅奉國軍節度使知紹興府徐夢莘北盟會編云金人許和上與二相議之趙鼎執不可一日奏事退秦檜留身奏以講和為便上曰講和之議臣僚之說皆不同各持兩端畏首畏尾檜曰此不足與斷大事若陛下決欲講和乞陛下英斷獨與臣議其事不許羣臣干預其事乃可成不然無益也上曰朕獨與卿議檜曰臣恐未便望陛下精加思慮三日然後別見奏稟又三日檜復留身奏事知上意欲和甚堅猶以為未也

乃曰臣恐復有未便望陛下更思慮三日容臣別奏又三日檜復奏事知上意堅確不移乃出文字乞決和議不許臣下干預上欣納鼎遂罷相鼎事實云鼎上章乞解機務上曰前日所議璩建節事如何鼎又如前所陳是時若能雷同相徇即留而不去鼎入辭從容奏曰臣笑此段詳見今年八月末并注

昨罷相半年蒙恩召還已見乎宸衷所向與鄉來稍異臣今再辭之後人必有以孝悌之說脅制陛下矣臣謂凡人中無所主而聽易惑故進言者得乘其隙而惑之陛下聖質英邁洞見天下是非善惡謂宜議論一定不復二三然臣甫去國已稍更改如修史本出聖意非羣

臣敢建言而未幾復修此為可惜臣竊觀陛下未嘗容
心特既命為相不復重違其意故議論取舍之間有不
得已而從者如此乃宰相政事非陛下政事也鼎行檜
奏乞同執政往餞樞密副使王庶謂鼎曰公欲去早為
庶言鼎曰去就在樞密鼎豈敢與檜至鼎一揖而去自

是檜益憾之

徐夢莘北盟會編云鼎首塗之日檜奏乞
備禮餞鼎之行乃就津亭排列別筵率執

政以待鼎相揖罷即登舟檜曰已得旨餞送相公何不
少留鼎曰議論已不協何留之有遂登舟叱篙師離岸
檜亦叱從人收筵會而歸且顧鼎言曰檜
是好意舟已開矣自是檜有憾鼎之意

徽猷閣待

制提舉江州太平觀傳崧卿黎確皆卒詔贈官推恩如
故事兵部侍郎兼權吏部尚書張燾言確平昔高談忠
義號為正人一臨變故遂失臣節北面邦昌之庭又請
邦昌修德以應天察其姦心欲置吾宋宗社何地哉諸
路帥臣領勤王之師將次京城邦昌求奉使以上軍者
確慨然請行遂奉邦昌手書持偽告擁黃旗以往其罪
抑可知矣陛下龍飛嘗加黜責而范宗尹當國力挽偽
黨布列朝廷故若確輩亦參法從忠義之士憤疾久矣

今又曲加贈卹使賞延于後何以示天下後世亂臣賊子之戒乎為國之道所先政刑政刑不明何以立國詔

確追奪徽猷閣待制其贈官恩澤依條施行

按確此時階官左中

大夫依條仍得致仕遺表恩澤二資

乙亥龍圖閣學士知紹興府孫近為翰林學士承旨端

明殿學士知洪州李光試吏部尚書前二日上召中書

舍人兼直學士院勾龍如淵草趙鼎免制如淵奏陛下

既罷鼎相則用人材振紀綱必令有以聳動四方如君

子當速召小人當顯黜上曰君子謂誰曰孫近李光上
曰近必召如光則趙鼎劉大中之去皆薦之朕若召則
是用此兩人之薦須朕他日自用之如淵曰此鼎大中
姦計也兩人在位時何不薦光及罷去而後薦之意謂
陛下采公言必用光故以示恩耳上又曰小人謂誰曰
呂本中上頷之如淵因奏臣向聞陛下言本中與張致
遠蓋專為附離計者今觀本中真小人也致遠似不然
如近日喻樗除著作佐郎臣親見其與宰相辨久之樗

鼎腹心士也臣恐陛下過聽以致遠與本中同科則實

不然願陛下察之

張戒默記曰趙鼎再相除喻樗為著作給事中張致遠獨袖堂劄還之除

著作又還之除正字復還之遂致趙鼎曰差除簿當送後省耳然致遠猶以朋附趙鼎罪去

直徽

猷閣主管萬壽觀兼崇政殿說書尹焞試太常少卿兼

職如故焞再辭不許自渡江以來惟天地宗廟之祭

用牲牢他悉酒脯而已至是右諫議大夫李誼言社稷

尚稽血食乞命禮官參酌舊制裁定從之

丁丑京東淮東宣撫處置使韓世忠乞赴行在奏事先

是徽猷閣直學士王倫與烏凌阿思謀至金庭金主亶復遣簽書宣徽院事蕭哲等為江南詔諭使來計事世忠聞之上疏曰金人遣使前來有詔諭之名事勢頗大深恐賊情繼發重兵壓境逼脅陛下別致禮數今當熟計不可輕易許諾其終不過舉兵決戰但以兵勢最重去處臣請當之因乞赴行在奏事馳驛以聞上不許按史此年張通古為使蕭哲副之而明年王倫答金主乃云簽宣蕭哲持國書許歸地或者通古乃元帥達蘭輩就行臺所遣亦未可知故先書金主遣哲後乃書通古

戊寅樞密副使王庶言間者金使之來大臣僉議或和或戰所主不同臣忠憤所激輒爾妄發不量彼已之勢不察時事之宜屢奏封章力請謝絕專圖恢復謂敵情不可以仁恩馴服王倫之往必致稽滯今聞奏報已還近境和議可決臣謀不逮遠知昧通方伏望速賜降黜或以適此執政闕員未便斥去即乞特降處分遇有和議文字許免簽書庶逃前後反覆有失立朝之節書奏已卯詔不許庶復上言人各有能有不能臣生於陝西

其風漸氣染耳目所聞見者莫非兵事禍亂以來嘗欲以氣吞強敵則所謂講和者非臣之所能也強使之則恐誤國家之大計故臣願陛下惟責臣以修戎兵不以講和之事命臣則緩急之際可以枝梧縱使金人知陛下專命臣以此則姦謀不得肆而和好易成雖曰治戎兵其實促使和也又況臣賦性愚魯嘗言金人不可和今若預此是臣身為大臣自為二三何可使也唐渾瑊馬燧李晟將之忠賢古所未有德宗能用之吐蕃君臣

大懼尚結贊謀曰唐之名將特此三人不去之必為吾患於是甘辭厚幣以申懃懇朝廷然之會盟於平涼李晟以言不可信罷渾瑊以被劫罷馬燧以為所賣罷果如其計而無一人留者願陛下察臣孤忠特留聖念又言臣前次所上章疏及與王倫議論寔有嫌妨陛下亦當洞照底裏今若不自陳稟又如趙鼎劉大中輩首鼠兩端於陛下國事何益兼臣備數樞庭自合辭職不合辭事乞除臣一近邊州郡願効尺寸不許

魏掇之戊午
謹議以底此

疏為第六第七劄之在烏凌阿思謀至都堂前誤也按此疏言王倫還及近境又言趙鼎劉大中首鼠兩端當在二人罷政之後與王倫未至行在之前庶劄子云今月二十六日奉御筆不許辭免已卯十月二十六日也故附於此

辛巳秦檜奏北使約仲冬上旬至泗州上曰所議殊未可解但可和即和不可和則否兵備不容少弛可徧諭諸將以為之備 中書舍人兼史館修撰兼直學士院呂本中罷侍御史蕭振言本中外示朴野中藏險巖父好問受張邦昌偽命本中有詩云受禪碑中無姓名其

意蓋欲證父自明爾趙鼎以解易薦李授之除秘閣本
中初不知授之鼎所薦遂怒形於色欲繳還詞頭已而
知出於鼎乃更為授之命美詞其朋比大臣無所守如
此望罷本中以清朝列詔本中提舉江州太平觀
壬午故武翼郎吳近贈宣州觀察使以才人之父特優
之也

建炎以來繫年要錄卷一百二十二

建炎以來繫年要錄卷一百二十二金人地名考證

薩里罕

原書作撒離喝
誤改見卷十一

達蘭

原書作撻辣
誤改見卷一

烏凌阿

原書作烏陵
誤改見卷一

欽定四庫全書

建炎以來繫年要錄卷一百二十三

宋 李心傳 撰

紹興八年十有一月癸未朔資政殿學士新知處州劉
大中提舉臨安府洞霄宮大中既罷侍御史蕭振復言
陛下既已斥逐大中而章疏留之三省臣恐去位之臣
飾詞惑衆天下之人疑為中傷非所以公示好惡於天
下乞報行論列大中章疏自今臣僚被論便應以所言

之事議罰不得旋請宮祠假善去之名以蓋愆惡故有是命 右諫議大夫李誼言陛下臨御於今一紀所用相凡十人執政三十三人然皆不久而去規模數易士知其不久則肆為同異而亡忌憚吏知其不久則專為苟簡以幸蔽欺陛下夙夜憂勤而治不加進殆必由此今左相虛位參政闕員乃擇賢之時望考以聖心參以公論儻選而得天下之才則責之專任之久可無數易之弊臣備位言責不敢復避形迹惟陛下察焉

誼此疏不得其

日以疏中有參政闕員之語
故且附孫近除命之前俟考

甲申左宣奉大夫尚書左僕射秦檜遷左光祿大夫以
祿秩成書也 翰林學士承旨孫近參知政事 殿中

侍御史張戒面對言臣昨奏疏十二事陛下雖甚嘉納
朝廷未嘗施行示弱招侮理在必然王倫遽回金使遂
有江南詔諭使及明威將軍之號不云國而且云江南
是以我太祖待李氏晚年之禮也曾不得為孫權乎一
則詔諭一則明威此二者何意金云詔諭臣不知所諭

何事金若果欲和則當以議和之名而來何詔諭之有
臣觀今日金使之來與前日大異禮不可屈事必難從
臣為朝廷計上策莫若遜詞却之其次且勿令遽渡江
先問其官名何意詔諭何事禮節事目議定得其實而
後進退之則尚可少折又曰臣自乙卯歲論戰必敗去
秋凡三年而後驗臣今又謂和必無成豈惟無成終必
招侮亦願陛下姑記之戒又言臣逆料其事只有四川
及江北地捨此復何詔諭之有又曰臣謂為國只當自

勉不可僥倖偷安果得偷安猶可但恐屈辱已甚而偷安亦不得耳講和而是則可以息兵非則亦可以招侮疏入秦檜怒愈有逐戒之意矣

乙酉中書舍人兼直學士院勾龍如淵言昔福建四川廣東西凡八路以其去朝廷之遠士艱於往來而以銓法付在漕司自車駕南幸而二廣福建則舉而歸之吏部矣惟四川漕司差注之法獨在是以蜀之人凡安貧守分無知已在朝廷者仕宦止於通判而奔競勢要之

人今日改官明日得倅又明日得守望參酌祖宗之制
凡四川守倅如何等關合還堂選立為定格毋相侵紊
詔吏部措置 詔犯私鹽人除流配依本法外徒以下

並令衆五日其後湖北提舉司言本路係省茶地分緣

茶鹽事屬一體乞犯茶人依此指揮從之

日歷無此今以紹興十三

年十月十八日湖北提舉司所申修入

徽猷閣待制江常以母憂免至

是卒於泉州

丙戌秦檜監修國史

權尚書禮部侍郎兼侍講張九

成罷初趙鼎之未去也九成謂鼎曰金失信數矣盟墨未乾以無名之師掩我不備今實厭兵而張虛聲以撼中國彼誠能從吾所言十事則與之和當使權在朝廷可也鼎既免秦檜謂九成曰且同檜成此事如何九成曰事宜所可九成胡為異議特不可輕易以苟安耳他日與呂本中同見檜檜曰大抵立朝須優游委曲乃能有濟九成曰未有枉已而能正人檜為之變色九成從容言於帝曰敵情多詐議者不究異日之害而欲姑息

以求安不可不察會檜聞九成在經筵講書因及西漢災異事大惡之九成入見面奏曰外議以臣為趙鼎之黨雖臣亦疑之上問其故九成曰臣每造鼎見其議論無滯不覺坐久則人言臣為鼎黨無足恠也既而九成再章求去上命以次對出守檜必欲廢置之奏除秘閣修撰提舉江州太平觀免謝辭詔建州鄉貢進士劉勉之令中書後省召試策一道勉之初以張致遠呂本中薦其學行召赴都堂乃有是命勉之引疾而歸

勉之初見

今年
四月

丁亥詔左武大夫榮州防禦使知閣門事藍公佐接伴
大金人使過界竢接伴官右司員外郎范同等到日交
割是日京東淮東宣撫處置使韓世忠復言恐金人詔
諭之後遣使往來不絕其如禮物以至供饋賜予蠹耗
國用財計闕乏贍軍不給則經所謂不戰而屈人之兵
望宣諭大臣委曲講議貴在得中以全國體 詔諸路
帥司各選委強明官一員將本路見禁一年已上公事

專一催趣結勘仍逐旋具已勘結名件申省以大理寺
言諸路多滯獄故也

戊子司農少卿徐林直顯謨閣為荆湖南路轉運副使
從所請也 殿中侍御史張戒為司農少卿 兵部員
外郎呂用中上疏辯父好問受偽命之謗且言金人偽
立邦昌好問陰募遣使臣李進冒重圍齎帛書往河北
求今上所在若使事少敗露則必閤家盡遭屠戮與夫
自經溝瀆身享美名子孫獲厚祿校量利害孰重孰輕

乞錄送史館從之

己丑詔張戒為耳目之官附下罔上可與外任坐前奏
疏乞留趙鼎也戒疏曰臣本貫河東絳州趙鼎本貫陝
西解州鄉里相近士大夫通號曰西人臣被召除館職
除郎官實自聖恩然人亦或云鼎進擬是非臣不得而
知也今趙鼎求去議者皆以為未可臣欲言則形迹如
此欲不言則大臣進退國家安危所係陛下他日必悔
之臣初不知鼎負陛下者何事鼎與同列忿爭者何語

鼎不敢自安者何意臣竊料陛下與鼎君臣之間嫌疑已久同列之際猜間已深鼎不自安已非一日假使勉強少留終非可否相濟聖意已決臣不復言但鼎去之後秦檜先悔而陛下後悔理在不疑此為可慮爾鼎去之後陛下必不獨任能忍事如鼎者絕少爭權者多後來者不三數月即與檜爭必矣此所謂秦檜先悔也陛下即位十二年而命相凡九人前後拜罷以三十數已試未試人材可知使後來者皆大過人雖去鼎可也若

但斥逐異已而遷除附已者徒為紛紛則與鼎何異萬
一緩急之際又將復用之使鼎何顏復見士大夫哉此
所謂陛下後悔也臣今為陛下計有三其上可留之鼎
若有負於陛下者面誠敕之鼎若與同列不協則面責
以先國家後私讐之義其次必不可則姑留之行在祖
宗故事宰執罷政多留京師非特示恩禮亦以備顧問
近時前宰執遂無復敢留行在乃薄俗可歎非祖宗意
也未罷相則如五日一到朝堂之類罷相則置之講筵

少俟期月之間朝政修明邊事寧謐然後聽其遠去亦未為晚進退之間猶為有禮不然去歲召之如彼其急今日去之如此其遽時有緩急事有大小臣恐天下不無竊議鼎尚不敢自保餘人何足道哉臣之區區所慮者國家之安危所惜者陛下之舉措陛下若以為公論則願聖心更加審處若以為迹涉朋附則罪何所逃亦惟陛下察之而已臣今為言事官進退皆出宸衷非鼎所敢與鼎若去位則臣事陛下無復嫌疑迹愈安矣在

臣計則幸鼎之去為便在陛下計則衆論以為未便也常同初除中丞以臣姓名薦於陛下鼎聞之縮頸吐舌

搖手人傳以為笑蓋鼎畏臣如此後旬日乃以戒知泉

州朱勝非秀水閑居錄云趙鼎復相植黨亦急凡凶險刻薄之士無不收用使造虛譽而排善類張戒其一

也趙薦常同為中司同即以鼎所喜奏為臺屬戒知其決去即露章請留以邀後福其言狂躁愚弄鼎既罷猶知泉州蓋由其黨與維持之力也紹興正論云戒以入文字論秦檜十事救胡銓等罷論秦檜十事他書不見胡銓事則不在此時正論蓋誤

初少師劉光世罷軍政上命賜第一

區至是中書舍人勾龍如淵駁之上曰今營繕實難但

光世罷兵柄奉朝請若恩禮稍加於舊則諸將知後福之有終皆効力矣卒賜第

庚寅尚書戶部員外郎霍彞守司農少卿樞密院編修官陳康伯為屯田員外郎 諸王宮大小學教授趙雍充樞密院編修官 是日上謂大臣曰王倫使回金人頗有善意朕即位十年以敵禍未平兵革饋餉重困民力曾無惠澤及於天下若上天悔禍敵肯草心休兵之後一切從節省雖常賦亦蠲減以寬百姓樞密副使王

庶言日者王倫再以和議出使臣嘗以為倫必不返議
決不成今倫既報歸是臣愚暗不達事理幾敗陛下之
事陛下雖以臣為可赦臣亦何顏以見陛下伏望聖慈
以晉武帝并賞張華賈充唐憲宗相裴度罷李逢吉得
失為鑒許臣自免退服田畝不許庶又言自昔禦敵雖
時有不同大畧唯和與戰一言而已今天下遭金人荼
毒虜劉者十過八九天子駐蹕南北屯兵阻險自固不
敢渡淮以窺長安其衰弱可謂極矣陛下過自貶損屈

辱稱臣遣使進幣項背相望或拘或囚嫚書惡聲無所
不至其困辱可謂至矣兵家至論不過曰知己知彼今
彼如是之強我如是之弱雖三尺之童皆知之王倫之
來反謂和好已成盡還侵地驗於古則不合審於今則
無謂察其情則包藏不細觀其勢則蹤迹可見獨陛下
斷以不疑而行之此殆天意未欲悔禍致使陛下篤於
孝思弗虞此姦謀也臣試更為陛下陳之議和之說正
緣彼外訐內叛上下携貳假我使命以安反側以幸寧

息遠不出一二載近或暮月必別生事此固不論且以目前所損言之使人疲於奔命財賦竭於資送將士軍卒挫其勇銳民庶困於將迎歲月廢於無益事勢至此非特敵人一旦敗盟無以支持又恐諸將師老財匱有弗戢之災禍可既乎此臣所以仰天椎心而泣血也臣前所謂朝廷自作不靖者正謂此爾且敵人雖無知豈不戒吳越之事乎寧肯付我土地與我兵馬使復不戴天之讐耶臣不敢飾非以質前說若復關陝則臣歸骨

有地宗族有相見之期松楸有展省之日豈臣所不欲哉第萬萬無此上誤聖明下誤生靈宴安酖毒必至噬臍矣昔楚懷王惑於張儀之口卒為秦所拘使其子孫銜涕忍耻以事仇讎之國終至覆亡今王倫語言反覆踪跡詭秘終恐養成厲階滋蔓難圖悔何可及願陛下深念前事勉思令圖不遠而復尚可救藥苟或不然其患豈可深言耶

辛卯京東淮東宣撫處置使韓世忠言臣得泗州申詔

諭使先遣到銀牌郎君言湏要接伴跪膝堦墀州縣官
拜詔若不如是定復回接伴不肯本州取接伴官歸州
臣切詳金人自要講和本非實情今使人方欲過界便
要接伴跪膝堦墀州縣拜詔如此即是使人經過一道
郡縣聽伏命令與臣前奏事理頗相符合兼既立此題
目意在難從收拾釁端故要生事敢爾恣橫決有重兵
在後專意脅持若到行朝必要陛下卑屈禮數更重萬
一俯從外則四方解體內則恐失人心定湏別有難從

須索如何應付事體至大伏望以國體為重深加計慮
熟賜講究貴在詳審免貽後患 召端明殿學士知常
州韓肖胄赴行在將遣報聘也

壬辰召檢校少傅慶遠軍節度使提舉江州太平觀郭
仲荀赴行在將使守河南也 是日京東淮東宣撫處
置使韓世忠言臣今續體探得銀牌郎君言到臨安府
日要陛下易衣拜偽詔及詔諭使要賓客相見如劉豫
相待禮數及稱今來詔諭所行禮數並是大金關下定

到臣切詳上件事理使人非久到行朝未審陛下何以應之想已宣付大臣預行講究非臣所知臣自聞此事曉夕實不遑安以臣愚見萬一陛下輕賜俯從即是金人以詔諭為名暗致陛下拜順之義此若果有實心欲修和好必須禮意相順闊畧細故各存大體今使人所來行徑皆是難從之事灼見姦謀欲生釁端臣雖聞欲還陛下關陝諸路誠見詭詐且如實欲交割若却要山東河北等路軍民歸業豈可遣發此聲一出人心搖動

復難安固今雖國勢稍弱然兵民事力尚可枝梧况諸
軍將士訓習之久覩此窘辱少加激勵豈無關心若隨
從稍有失當舉國士大夫盡為陪臣深慮人心離散士
氣凋沮日後臨敵如何賁勇若四方傳聞陛下以有拜
順之禮其軍民定湏思鄉自然散去散易聚難悔將何
及今若待其重兵逼脅束手聽命坐受屈辱不若乘此
事力申嚴將士為必戰之計以伐其謀免貽後患臣邊
遠庸材荷國厚恩無以補報今正當主辱臣死之時臣

願效死節激昂士卒率先迎敵期於必戰以決成敗臣若不克事勢難立至是陛下委曲聽從事亦未晚竊詳金人欲要陛下如劉豫相待禮數且劉豫係金人偽立而陛下聖子神孫應天順人繼登大寶豈可相同顯見故為無禮全失去就玷辱陛下伏望特回聖念時上親劄付世忠令差人防護北使往回不得少有疎虞仍嚴戒將佐及所差人不得分毫生事

癸巳世忠復言傳聞金人欲還陛下陝西五路未必實

情設若果肯交割萬一却要山東河北等路軍民歸業
陛下如何遣發縱未如此且先要歸朝及北來投附之
人其數已衆散布中外諒陛下亦難依從大槩金人姦
謀凡所施設巧偽甘言以相啗賺盡欲陛下先失天下
人心繼為大舉臣曉夜痛心疾首惟恐陛下輕易許從
自速後患疏入上優詔答之 徽猷閣待制知臨安府
張澄言臨安古都會引江為河支流於城之內外交錯
而相通舟楫往來為利甚博歲久堙塞民頗病之頃由

陸對嘗冒天聽乞因農隙畧加濬治議者恐其勞民也
至於今未克行之今駐蹕之地公私所載資於舟船者
百倍前日所計特最關利害者兩河爾非盡開城中之
河也臣再行講究更不調夫興工乞刷那兩浙諸州壯
民及廂兵共千人赴本府量度緊慢開濬以工程計之
半年之外河流無壅塞矣從之 初新知筠州葉擬請

福建鹽半給小鈔與官賣兼行庶幾課息增羨事下提
刑提舉司委通判福州趙壽相度壽言初行鈔法時官

鹽本每斤六錢客人鈔錢三十二錢有半今薪米益貴
鹽本錢斤為十有七比舊至三倍而建汀南劍州邵武
軍遣衙前運鹽貨賣每斤百錢自水脚糜費之餘所贏
無幾若以其半行小鈔則每斤又增上供九錢通舊為
六十如此則民間食貴鹽而州縣失省計不可行至是
兩司以聞詔從壽議

甲午京東淮東宣撫處置使韓世忠言切詳金人與本
朝結怨至深又金人事力熾盛敵情窺伺已踰十年朝

夕謀畫意在吞并今遣使講和及傳聞許還關陝諸路
謂是懼我兵威謂復是曾遭毒殺事不得已故來講和
臣深思熟慮但恐以交割諸路為名先要山東河北等
路軍民或先要應北來歸朝投附女真契丹渤海漢兒
簽軍等出此聲勢搖動人心或假此講和割地或以兵
勢逼脅有無厭難從須索蠹耗國用使陛下先失天下
人心坐致困弊方為大舉今國家避地東南目前軍勢
敵尚隄防雖謀吞并未敢輕易深入故用此謀詐許交

還陝西意望移兵就據分我兵勢其敵必別有謀畫志
在一舉決要傾危絕彼後患况陝西諸路出兵產馬用
武根本之地豈肯真實交割資助我用顯是巧賜甘言
以相誑賺切恐使人暗贏陛下禮數輕賜許諾傳播四
方人心離散士氣凋沮事繫安危在此一決委非細事
望許臣輕騎星夜暫赴行朝面稟聖訓以盡曲折

丙申徽猷閣直學士提舉醴泉觀王倫至行在倫引疾
乞在外宮觀不許仍令日下赴內殿奏事起居郎兼

資善堂贊讀藹符為中書舍人免召試陞翊善將俾副
王倫也

戊戌監察御史鄭剛中遷殿中侍御史 召直祕閣新
知筠州高公繪赴行在將使介聘也 是日太常卿兼
崇政殿說書尹焞稱疾在告遂卧家不出

己亥王倫充國信計議使藹符充副使並日下出門符
稱疾不受 給事中兼侍講張致遠充顯謨閣待制知
廣州從所請也 寶文閣學士知廣州連南夫依所乞

提舉江州太平觀

庚子參知政事孫近兼權同知樞密院事以樞密副使王庶累章求去故也庶之奏曰臣切詳王倫之歸以為和好可成故地可復皇族可歸上自一人下逮百執事皆有喜色獨臣愚闇不達事機早夜以思揣本齊末未見其可臣復有強聒之請別無他腸止知愛君和之與否臣不復論且以目今金人利害言之講和為上遣使次之用兵為下何以言之金人自破大遼及長驅中原

幾三十年矣所得土地數倍漢唐所得珠玉子女莫知
紀極地廣而無法以經理財豐而恃勢以相圖又老師
宿將死亡殆盡主幼權分有患失之慮此所以講和為
上也金人滅大遼蕩中原信使往來曾無虛日得志兩
國專用此道矧自廢豫之後蹤迹敗露杞梓不安故重
報使人以安反側兼可以察我之虛實耗我之資糧離
我之心腹怠我之兵勢彼何憚而不為此所以遣使為
次也金人之兵內有牽制外多疑忌所用之人非若昔

日之勇銳所簽之軍非若昔日之强悍前出後空有覆
巢之虞率衆深入不無倒戈之慮又淮上荒虛地無所
掠大江浩渺未易可渡諸將兵勢不同曩時所以用兵
為下也今彼所行皆上策至為得計吾方信之不疑墮
其術中惟恐不如所欲臣不敢效子胥出不祥之言殺
身以立後世之名於國何補唯陛下深思之速斷之無
使後之視今猶今之視昔天下幸甚臣蒙陛下過聽擢
置樞庭言雖忠而不適於時慮雖深而不明乎變愚魯

自信滯固不移臣亦自厭其遲鈍況他人乎兼自今冬
以來疾疹交作精神昏耗脚膝重腿若猶貪冒寵榮不
知退避罪戾之來所不可追陛下雖欲保全有所不能
伏望矜臣衰憊保臣始終俾解職事除臣一在外宮觀
差遣以便醫藥上乃許之 左朝奉郎張廣為秘書省
著作佐郎廣德興人知廣德軍以薦者得召見論當今
之法其未便者有二皆前日言利之臣不究本末急近
效而昧遠圖所謂營田贍軍酒庫是也今營田悉籍於

官還定之民執空契坐視故土而不得復戶部轉運司
閤失賦稅號為逃閤者不知每歲幾何其視營田誰得
誰失此營田之未便者也諸州承認大軍月椿之費常
若不繼朝廷置贍軍酒庫本以佐之今但許取撥一分
而已積日既久利源侵奪此贍軍酒庫之未便者也若
謂未可遽罷則莫若許歸業之民漸認故土而取權酤
所入之贏盡以佐諸州月椿之數則得矣事下戶工部
後不行

廣疏以是月
甲申行下

江南西路轉運副使逢汝霖直

秘閣以宣諭官李寀言其勞績也

辛丑詔大金遣使至境朕以梓宮未還母后在遠陵寢
宮闕久稽汎掃兄弟宗族未得聚會南北軍民十餘年
間不得休息欲屈已求和在庭侍從臺諫之臣其詳思
所宜條奏來上限一日進入先是禮部侍郎兼侍讀曾
開上疏言女真和議稽諸前古為可憂考之今事為難
信而朝廷不思有以伐其謀方且忘大辱甘臣服貶稱
號捐金帛以難得之時為無益之事可不為痛哭流涕

哉夫敵人叵測不可保也自用兵以來信使方至兵輒隨之皆已然甚明之驗不待考諸古而可知況今敵人之在京師者方建鎮南之號增屯戍之守閱戰艦備糗糧簡雙丁無非為南下之計而我乃日夕冀望和議之成豈不惑哉恭惟陛下仁孝誠至哀慕深切則迎奉梓宮之使不得不遣今既再往矣梓宮之來杳然無期而託以和議虛費時月使彼果有休兵息民之意則梓宮自當即還和議一言可決何必紛紛為他說乎竊聞敵

使方責我以招降之事是求瑕釁耳非講和也本以迎梓宮而遣使今乃反致釁隙豈非自取哉伏望陛下以越為心以楚為戒無忘大耻無惑和議堅心定志一於自治使政事修於內兵將強於外則將不求而自和矣臣竊謂敵使之來所係甚大內外臣寮章疏劄子論及此事者願陛下悉以降付三省樞密院使輔弼大臣集侍從官預加熟議使應酬之間不至失悞庶無後悔兵部侍郎兼權吏部尚書張燾亦請詢可否於衆檜乃白

上下此詔焉

胡銓封事稱秦檜建白令侍從臺諫參議可否恐即此詔耶

寶文閣

直學士知台州梁汝嘉試尚書戶部侍郎中書舍人

樓炤試給事中

太常少卿兼崇政殿說書尹焞權禮

部侍郎兼侍講焞固辭不拜宗正少卿張詢為太常

少卿

日歷無此本寺題名在十一月故因尹焞改除遂書之當求本日

京東淮東宣

撫處置使韓世忠言臣伏讀宸翰鄰邦許和臣愚思之

若王倫蓋公佐所議講和割地休兵息民事蹟有實別

無符合外國誑賺本朝之意二人之功雖國家以王爵

處之未為過當欲望聖慈各令逐人先次供具委無反覆文狀於朝以為後証如臣前後累具已見冒犯天威日後事成虛文亦乞將臣重置典憲以為狂妄之戒先是世忠數上疏論不當議和上賜以手劄曰朕勉從人欲嗣有大器而梓宮未還母后在遠陵寢宮禁尚爾隔絕兄弟宗族未遂會聚十餘年間兵民不得休息早夜念之何以為心所宜屈已議和以圖所欲賴卿同心其克有濟卿其保護來使無致踈虞世忠既受詔乃復上

此奏詞意剴切由是秦檜惡之

壬寅兵部侍郎魚權吏部尚書張燾言臣竊惟敵使之來欲議和好將歸我梓宮歸我淵聖歸我母后歸我宗族歸我土地人民其意甚美其言甚甘廟堂以為信然而羣臣未敢以為信然國人未敢以為信然竊考其說蓋以謂彼非畏我兵甲之盛也非憚我土地形勢之強也而遽有此議深謀密計未易測也論者謂中原之地彼自知決不能有也故有此議又謂彼因廢豫人心遂

疑懼我乘間恢復土地故有此議又謂契丹林牙漸有
興復之勢彼既與我為深讐非施大恩於我無以結無
窮之援也故有此議又謂彼國上下厭兵為日久矣姑
務休息故有此議又謂敵帥屢死新帥之立懼不敢當
推避再四與國人約必盡歸我父母宗族國人許之然
後敢立故有此議凡是數者言皆有理使敵計果出於
此可謂善自為謀矣陛下所以必信無疑遂欲屈而聽
之也然茲事體大振古所無豈敵能為實關天意臣請

一為陛下推原之傳曰天將興之誰能廢之臣請考人
事以驗天意陛下飛龍濟州天所命也敵騎屢侵行闕
卒以無虞天所保也歲在甲寅一戰而敗敵師天所贊
也歲在丙辰再戰而却劉豫亦天所贊也歲在丁巳鄺
瓊雖叛乃為偽齊廢滅之資亦天所贊也是蓋陛下躬
履艱難側身修行布德立政上當天意而天祐之之所
致也臣以是知上天悔禍蓋有日矣中興之期亦不遠
矣伏願陛下姑少忍之益務自修益務自治益務自強

以享天心以聽天命以俟天時時之既至吉無不利何
戰不勝何攻不克何為不成何功不立梓宮何患乎不
還淵聖何患乎不返母后何患乎不歸宗族何患乎不
復宗廟陵寢何患乎不能繕修南北之民何患乎不能
混一今此和議姑為聽之而無必信可也彼使既已及
境勢難固拒使其果有願和之意如前所陳如我所欲
是必天誘其衷使之悔罪必不復強我以難行之禮而
在我者將以已行之禮待之則事亦何患乎不成如其

初無此心二三其說責我以必不可行之禮而要我以必不可從之事其包藏何所不有安知非上天堅我復讐之志乎便當責以大義杜絕其來修政事謹邊防厲將士俟天休命起而應之此臣區區之愚見也其他利害羣臣類能言之臣不復陳伏願陛下斷自淵衷毋取必於敵而取必於天而已若乃畧國家之大耻置宗社之深讐躬率臣民屈膝外國北面而臣事之以是而覲和議之必成非臣所敢知也上覽奏愀然變色曰卿言

可謂盡忠然朕必不至為敵人所紿方且熟議必非詐
偽然後可從如其不然當再遣使審問虛實而拘留其
使人燾頓首謝 吏部侍郎晏敦復言自古外國為中

國患世皆有之然未有若今日之甚者自古外國與中
國通和亦世皆有之然未有非中國強盛力足以制之
而自肯與中國和好者也大金兩次遣使直許講和
非畏我而然也又且幣重而言甘烏知非誘我耶此不
可無疑也陛下以梓宮未還母后在遠陵寢宮闕久稽洒

掃兄弟宗族未得會聚南北軍民不得休息意欲屈已
就和此誠聖人之用心也然所謂屈已者當思有益於事
則小屈可為也儻於大事非徒無益又且因而別致禍
患則可不深思熟慮之乎一事既屈則又以他事來屈
我矣小事既屈則必有大事來屈我矣且以目前可見
者言之今所遣使以詔諭為名儻欲陛下易服而拜受
還可從乎又欲與陛下分庭而抗禮還可從乎設或如
此等事從其一二則與彼上下之分已大定矣自此之

後可以號令我矣彼或又行詔令授陛下一兩鎮節鉞
封陛下一王號還可從乎又或下令將本朝大臣諸將
盡行封拜還可從乎又或下令用彼年號正朔還可從
乎又或下令盡遣西北人歸鄉里還可從乎姑畧舉此
數事則過此以往可推而知之儻謂今日許和出彼誠
意或別有道理今日小屈之後更無他事可慮則臣所
不能知萬一有如臣所言則自今以往一事有不順從
者彼便可以違命之罪加我矣尚何梓宮可保必得乎

皇族可保必歸乎地界可保必守乎如此則休息之期
當益遠矣且我之所急者梓宮也宗族也而敵獨先以
地界來議則事之可疑者亦多矣何則以河為界敵亦
謂我未必能守一也使我捨江淮之險而趨平地二也
西北之人懷土者皆使散走三也如此梓宮宗族牽制
我矣小有違異即釁端也審如是則社稷之存亡在敵
掌握爾陛下必欲屈已就和願陛下周思而熟慮之謹
擇而善處之若已屈之後必不致有如臣前所陳之禍

患陛下小屈以就大事可也臣又竊料專以和議為是者必謂和議既成則兵可不用而得休息是大不然臣竊謂和議與用兵二者不可偏廢若和議既成之後敵之詔令必有不可從者不免違異而敵以逆命來則兵可不用乎然則屈己之事誠不可不審而後行也使敵知我不憚用兵則和或有可議之理然則屈己之事似未輕易許也願陛下加聖心焉 權吏部侍郎魏珰言臣素不熟敵情不知使人所須者何禮陛下所謂屈已

者何事聞諸道路之言謂金人頃立偽齊使之屈膝受
令北面之禮靡所不至歲時之貢靡所不取今需於我
未必盡然以事料之其間必有不可從者如屈膝受令
則大不可從者也賊豫本匹夫爾既為金人所立恩莫
大焉北面拜舞禮亦宜之陛下承一祖七宗基業海內
愛戴一紀於茲天命有歸何藉於金國乎傳聞奉使之
歸謂金人悉從我所欲不復有所湏其誠然耶必無難
行之禮以重困我陛下何用過為卑辱以取輕侮乎如

或為不可從之事先有所要則其詭詐之情固可見矣
儻或輕從之屈膝受令他時反為所制號令廢置將出
其手一有不從便生兵隙予奪在彼失信在我非計之
得也雖使還我空地如之何而可保雖欲寢兵如之何
而可寢雖欲息民如之何而可息楚人衷甲吐蕃刼盟
前史載之詳矣庸可不慮乎且禮經復讐之義臣未暇
論也姑以人主之孝論之孔子稱明王之以孝治天下
則曰天下和平災害不生禍亂不作故以一人有慶兆

民賴之為天子之孝方今宗廟社稷惟陛下是依天下
生靈惟陛下是賴陛下既欲為親少屈更願審思宗社
安危之機與夫天下治亂之所繫考之古誼酌之羣情
擇其經久可行者行之其不可從者以國人之意拒之
庶幾軍民之心不至懷憤且無噬臍之悔也宗社安而
國家可保此非天子之孝乎紹興三年敵使遽至朝廷
數遣官報聘明年使人方且交馳而敵騎侵淮甸矣天
啓陛下之心六師鱗次江上力為戰守之具其冬魏良

臣等以使事回敵人約再遣使為恐迫之語陛下悟其
姦計不復再遣敵遂引去陛下因敵使之來博詢在廷
抑聞孟子有云左右皆曰不可勿聽諸大夫皆曰不可
勿聽國人皆曰不可然後察之見不可焉然後去之如
此然後可以為民父母所謂國人者不過萬民三軍爾
搢紳與萬民一體大將與三軍一體今陛下詢於搢紳
民情大可見矣惟三軍之心未知所向和議國之大事
豈可不訪之兵將乎欲望聖慈速召大將各帶所部近

上統制官數人同來以屈已事目廣加訪問以塞他日
意外之憂彼或以為不可亦能鼓作其氣益堅守禦之
備時諸將韓世忠岳飛皆以議和為非計故砭有是言
既而砭以憂去

癸卯秘書少監劉一止試起居郎 徽猷閣直學士右

朝議大夫知平江府向子諲轉一官致仕時金人所遣

詔諭使將入境子諲不肯拜敵詔乃上章乞致仕秦檜

許之

此以徐夢莘北盟會編修入十一月初十日韓世忠劄子今續體探得銀牌郎君立候詔諭過界接

伴於界首望北拜奏聖躬萬福再五拜訖只在位立候
詔諭使馬過然後上馬隨後行至館中詔諭使面南列
坐畢令按伴使于階下展狀躬身稱喏了上廳跪勸詔
諭使酒及所過州縣官吏迎詔拜詔送詔如詔諭使入
境一州不依前約禮數即打一州其館伴依接伴禮數
按此時金使未入境但子諲聞其說耳夢莘稱張通古
入境子諲不拜而請致仕蓋小誤今修潤書之

甲辰樞密副使王庶充資政殿學士知潭州庶論金不
可和於道上疏者七見帝言者六秦檜方挾金自重以
為功絀其說庶語檜曰公不思東都抗節存趙時而忘
此敵耶檜大恨庶又抗章求去乃有是命是日檜進呈

上因言近日士大夫好作不靖胥動浮言以無為有風俗如此罪在朕躬卿等大臣亦與有罪蓋在上者未有以表率之故也檜曰風俗如此臣等實任其責孫近曰陛下聖德躬行多士狃於習俗未能鄉化時疆事稍定當湏明政刑以示勸懲庶幾丕變

中興聖政臣留正等曰事有係乎天下國

家之舉者利害參而未明取舍同而未審凡議論所到亦何怪於紛紛乎善斷者本理以論成事則紛紛者將自定矣此盤庚所以教民也紹興初大臣主和議而衆志之未孚乎甚於盤庚之遷也浮言動衆上之所患風勵表率所責於大臣者何事而大臣乃欲明政刑以示勸懲果何心哉自是士大夫曾駁和議不合風旨者皆以

怨訐抵刑譴其丕變之言將為必酬平日之言以示威也豈不深負太上皇帝責望之意哉大臣誤國甚矣

中書舍人兼侍講兼學士院勾龍如淵試御史中丞

時秦檜方主議和力贊屈己之說以為此事當斷自宸

衷不必謀之在廷上將從其請而外論羣起計雖定而

未敢畢行如淵言於檜曰相公為天下大計而羣說橫

起何不擇人為臺官使盡擊去則相公之事遂矣檜大

悟遂擢如淵中司人皆駭愕

此並據晏敦復墓誌修入

給事中樓

昭兼直學士院

日歷無此今以本院題名修入

侍御史蕭振權尚書

工部侍郎振乞留王庶故有是命 兵部侍郎兼權吏

部尚書張燾兼史館修撰 尚書吏部員外郎王次翁

試秘書少監 左朝奉大夫魏良臣行尚書吏部員外

郎 朱勝非秀水閑居錄云達蘭統兵犯淮甸朝廷遣魏良臣奉使數問秦檜仍稱其賢乃知檜初相時所陳

二策出於金意也逮其再相力薦良臣入為都司繼除從官欲弭其言耳 國子監丞王利

用為秘書郎

乙巳端明殿學士韓肖胄提舉萬壽觀肖胄自常州入

對遂有是命

丙午王庶入辭命坐賜茶庶奏臣異議罔功必致人言
乞改除宮觀上不許復溫言諭遣之遂召徽猷閣直學
士知潭州仇愈赴行在

丁未左朝奉大夫主管台州崇道觀王縉復直秘閣知
常州 龍圖閣直學士提舉江州太平觀汪藻上所編
集元符庚辰至宣和乙巳詔旨終篇凡六百六十有五
卷拜藻顯謨閣學士其屬官右朝散郎鮑延祖左宣義
郎孟處義各又進一官 是日樞密院編修官胡銓上

疏曰臣謹按王倫本一狎邪小人市井無賴頃緣宰相
無識遂舉以使敵專務詐誕欺罔天聽驟得美官天下
之人切齒唾罵今者無故誘致敵使以詔諭江南為名
是欲臣妾我也欲劉豫我也劉豫臣事金國南面稱
王自以為子孫帝王萬世不拔之業一旦金人改慮猝
而縛之父子為虜殷鑒不遠而倫又欲陛下效之夫天
下者祖宗之天下也陛下所居之位祖宗之位也奈何
以祖宗之天下為金人之天下以祖宗之位為金國藩

臣之位陛下屈膝則祖宗廟社之靈盡被污辱祖宗數百年之赤子盡為敵有朝廷宰執盡為陪臣天下士大夫皆當屈體事人變亂倒置異時無厭之求安知不加我以無禮如劉豫也哉夫三尺童子至無知也指仇敵而使之拜則怫然怒今堂堂大朝相率而拜仇敵曾無童稚之羞而陛下忍為之邪倫之議廼曰我一屈膝則梓宮可還太后可復淵聖可歸中原可得嗚呼自變故以來主和議者誰不以此說啗陛下哉然而卒無一

驗則敵之情偽已可知矣陛下尚不覺悟竭民膏血而不恤忘國大讐而不報含垢忍耻舉天下而臣之甘心焉就令敵決可和盡如倫議天下後世謂陛下何如主也况敵人變詐百出而倫又以姦邪濟之則梓宮決不可還太后決不可復淵聖決不可歸中原決不可得而此膝一屈不可復伸國勢陵夷不可復振可為痛哭流涕長太息者矣向者陛下間關海道危如累卵當時尚不忍北面臣敵况今國勢稍張諸將盡銳士卒思奮只

如頃者敵勢陸梁僞豫入寇固嘗敗之於襄陽敗之於
淮上敗之於渦口敗之於淮陰較之前日蹈海之危已
萬萬矣儻不得已而至於用兵則我豈遽出敵人下哉
今無故而反臣之欲屈萬乘之尊下穹廬之拜三軍之
士不戰而氣已索此魯仲連所以義不帝秦非惜夫帝
秦之虛名惜夫天下大勢有所不可也今內而百官外
而軍民萬口一談皆欲食倫之肉謗議洶洶陛下不聞
正恐一旦變作禍且不測臣竊謂不斬王倫國之存亡

未可知也雖然倫不足道也秦檜以心腹大臣而亦然
陛下有堯舜之資檜不能致陛下如唐虞而欲導陛下
為石晉近者禮部侍郎曾開等引古誼以折之檜乃厲
聲責下侍郎知故事我獨不知則檜之遂非狠愎已自
可見而乃建白令臺諫侍臣簽議可否是蓋畏天下議
已而令臺諫侍臣共分謗耳有識之士皆以為朝廷無
人豈不惜哉夫石晉之事契丹也桑維翰主之其初意
亦以契丹强大可藉其力以保其割據之地而卒無救

於敗亡况我朝為天下共主與敵有君父之仇而敵之
詭譎甚於契丹如之何可行耶孫近傅會檜議遂得參
知政事天下望治有如飢渴而近伴食中書漫不敢可
否一事檜曰敵可講和近亦曰可和檜曰天子當拜近
亦曰當拜臣嘗至政事堂三發問而近不答但曰已令
臺諫侍從議之矣嗚呼參贊大政徒取充位如此有如
敵騎長驅尚能折衝禦侮邪臣竊謂秦檜孫近亦可斬
也臣備員樞屬義不與檜等共戴天區區之心願斷三

人頭竿之藁街然後羈留敵使責以無禮徐興問罪之師則三軍之士不戰而氣自倍不然臣有赴東海而死寧能處小朝廷求活耶書奏市井喧騰數日不定秦檜上表待罪有詔檜無罪可待乃復治事銓遂罷

戊申接伴使范同奏金使遣人議過界上曰若使百姓免於兵革之苦得安其生朕亦何愛一己之屈時上下洶洶上手劄付同塗中稍生事當議編置

勾龍如淵退朝錄云時金

國遣二使携書來書中蓋以河南之地盡歸於我者唯是使人入界索禮過當號其書曰詔書指吾國曰江南

見吾伴使必欲居堂中而坐使人於一隅所厯州縣必欲使官吏具禮迎其書如吾中國迎天子詔書之禮且言敵書到行在必欲上再拜親受之上下洵洵不知既所為上親劄付館伴范同途中稍生事當議編置

而敵使蕭哲與其右司侍郎張通古入境同北向再拜

問金主起居軍民見者往往流涕

此據張燾率從官所上疏修入疏云此故

事也則李永壽烏凌阿思謀之來蓋嘗行此禮矣當時外議皆謂蕭哲張通古入境范同再拜為失體俟再考

禮部侍郎兼侍讀曾開言臣訪聞敵使在路語接伴

范同云本國主相及軍前並無遣使之意江南令王倫來喚我倫百拜懇告不得已而來不知有何事商量又

以排辦頻次行有里數數怒濡滯出語不遜范同具因
依申朝廷不知既聞此語嘗有以答之乎又聞隨行三
節人從在路恣其出入並無檢察有下節女真常先半
程肆意而行將至之日夜半押馬過臨平逮曉已至江
漲下節一名鄺瓊將官旁觀者多識之此皆朝廷所當
譏察不可忽者也陛下初遣使本為奉迎梓宮而王倫
之還創生和議疑其不可信故諭倫云若金國果有欲
和之意當自遣使來商議倫執陛下聖意遂至哀告求

請敵使得以藉口謂本無來意因倫拜告而來陛下觀此意豈非盛氣而陵我乎臣竊聞王倫前此回日所得敵書已有早遣使人以圖休息之辭則今敵使豈可謂我呼之而來自當諭館伴官以此語折之也敵帥拒我禮物而不受書意責我以招降而使者自入我境已有傲慢侵陵之語就館之後言語禮貌必無遜順願陛下堅前日之說察其情偽勿輕見之或止令執政與之商議最為得體所有敵使隨行三節人從乞嚴行約束勿

放出館夫朝廷之事固有當密如行軍用間已成之謀
一或漏泄為害非輕今日之事特未定也正當大詢於
國兼衆智而用之豈可但憑一市井駟儻之說而大臣
不肯身任侍從不容與聞者乎臣願陛下以輔臣留身
所論使事明賜宣諭以臣僚所論使事悉賜降出使大
臣集兩省侍從官公共熟議取其是者斷而行之無為
含糊囁嚅之論以招後悔

開此疏不得本日因范同奏
事附見徐夢莘北盟會編又

有開一疏其詞淺俗而魏
揆之謙議無之今不取

是日資政殿大學士新江

南西路安撫制置大使兼知洪州張守入辭命坐賜茶
守與顯謨閣待制新知廣州張致遠皆乞黃榜以招安
南安諸盜許之

己酉詔責授寧江軍節度副使莫儔永不收叙先是朱
勝非當國許儔便居儔既還浙西諫官李誼論其罪章
上不行後數月乃有是命

誼以今年五月上章不
知許時何以不行也

庚戌北使書狀官行臺尚書省主簿魏千運卒於高郵
軍賜白金六百兩張通古等還乃焚其骨而歸

辛亥秘書省正字范如圭獻書於秦檜曰禮經有曰父
母之讐不與共戴天寢苫枕干誓死以報徽宗皇帝顯
肅皇后崩於沙漠去春凶問既至主上攀號擗踊哀動
天地四海之內若喪考妣相公身拜元極不以此時建
白大義乘六軍痛憤之情與之縞素揮戈北向以治女
真不共戴天之仇顧遣一王倫者卑辭厚幣以請梓宮
甚矣謀之顛錯也春秋之法讐不復賊不討則不書葬
葬者臣子之事也不書葬以為無臣子也天下之痛莫

甚於不得其死而不復讐不討賊使神靈銜冤抱恨於
地下而不得伸雖得梓宮而葬之於臣子之心能安否
乎古之人有命將出師誓滅鯨鯢以迎梓宮者矣雖其
力小勢窮不能有濟而名正言順亦可以無愧於天下
後世未聞發幣遣使祈哀請命以求梓宮於仇讐之手
者也女真用是知我無復讐之心可以肆為玩侮乃示
欲和之意使倫歸報交使往來至於再至於三其謀益
深言益甘我之信彼益篤禮益恭墮其計中不自知覺

雖三尺童子皆為朝廷危之倫之言曰女真欲以梓宮
母后淵聖皇帝中原境土悉歸於我審如是豈惟足以
解吾君終身之憂哉乃天下臣子之所大願也然自王
者迹熄五伯而下鮮不以詐力相傾今乃欲以誠信之
道望於讐敵寧有此理且諱日之報與不報在彼無毫
釐利害至不難從之事也我之懇請屢矣而寂無聞焉
於其至易者尚不我從則其他可知矣春秋之法凡中
國諸侯與外國盟會者必謹志而深譏之其法嚴矣女

真自海上結盟借助於我以滅契丹契丹既滅遂犯汴
都其不可信一也既而城下之盟講解而退矣曾不旋
踵復圍太原其不可信二也自是厥後和使項背相望
而侵犯之兵無歲不有其不可信三也既破京城乃始
歛兵議和誘我二帝出郊劫之而去其不可信四也劉
豫其所立也事之無所不至一旦執之如探囊中物其
不可信五也彼包藏姦詭而不可測度如此何為一旦
與我如此之厚哉或謂金主初立尼瑪哈已死親族離

叛契丹復振方務自保畏我加兵故欲釋憾解仇以免
南顧之患豈其然乎自劉豫既廢之後我益畏縮遠屏
未嘗敢向北方發一矢彼何憚於我哉是深謀長計欲不
費一鎊而坐收混一之功耳聞其使稱詔諭挾冊命而
來要主上以下拜之禮果有之乎其無之也果可從乎
其不可從也反面事讎匹夫猶不肯為忍以堂堂之宋
君臣相率而拜不共戴天之人哉主上哀疚在躬孝友
天至必曰吾為梓宮屈為皇太后屈為淵聖皇帝屈何

不可之有使子弟之情獲伸於一日志願足矣遑恤其
他相公何不以必然之理開陳於咫尺之前乎誠使一
旦拜受女真之詔冊則將行女真之命令頒女真之正
朔普天之下莫非女真之土率土之濱莫非女真之臣
我宋君臣上下雖欲求措身之所且不可得徽宗顯肅
之梓宮遂無地可葬母后淵聖之輦輅遂無家可歸矣
無乃違主上聖孝之心失相公大忠之節乎昔漢高祖
責數項羽兵不少解卒免太公於俎上晉大夫征繕以

輔孺子使惡我者懼卒能歸惠公於強秦此古人已試之明驗也相公不用此策以慰我主上孝弟之念奈何欲誤主上舉祖宗二百年之天下委而棄之哉今所以委曲順從敵意不敢少有違忤者惟恐其不歸梓宮母后淵聖而加兵於我耳曾不知一正君臣之分則號令生殺皆出於其手設若擁梓宮母后淵聖於大江之外下一紙詔召吾君相以下來迎于境我若從之立有禍變如其不從彼將責我曰吾歸而父母之喪歸而親歸

而兄有大造於而國乃違我之命不肯來迎是不孝於
父母不恭於兄不忠於我也聲罪來問將何以待之事
至如此則前日所以順從其意者非特無分毫之益適
足以致莫大之禍和好既敗雖欲兵之不用其可得乎
為和之說者必曰今雖講和而邊備實未嘗弛必無意
外之患以如圭觀之朝廷以議和之故謂謀臣猛將可
以折衝禦侮者皆無所用或斥逐而遠之或併之於驕
庸之帥又將包羞忍恥甘心屈辱以沮喪士氣而離其

心殆若歸馬放牛示天下不復用兵者而謂之不弛邊
備是內欺其心上欺人主下欺億兆之衆也主上南面
而君天下十有二年矣其即位也由天下軍民推戴所
迫不得已而從之至於今日天下軍民豈肯聽吾君北
面而為仇敵之臣哉主上以思念君父母兄之故不憚
於屈已天下軍民以愛君之故不肯聽主上之辱身用
此拒敵不為無辭者若其舉兵而來適足以激怒吾衆
我以大義明詔天下率勵瘡痍之餘共雪父兄之恥乃

不可失之機會也相公若必欲拂天下之情贊成主上
受此屈辱有如姦雄因衆心之憤擁數十萬之衆仗大
義以問相公之罪則將何辭以對宣和靖康以來為女
真所屠戮者非將士之父兄則其子弟幸得脫身於鋒
鏑恨不得女真之肉嚼而食之今相公反愛信之如天
屬之親萬口籍籍扼腕忿怒莫不歸罪於相公相公亦
知之乎相公嘗自謂我欲濟國事死且不恤寧避謗怨
相公之心則忠矣使殺身而有益於君固志士仁人之

所願為也若犯衆怒陷吾君於不義政恐不惟怨謗而已將喪身及國毒流天下遺臭萬世苟非至愚無知自暴自棄天奪其魄心風發狂者孰肯為此若曰聖意堅確臣下莫之能回此非所望於相公也檜不答是日

樞密院編修官胡銓昭州編管銓之上書也都人喧騰

數日不定上語秦檜曰朕本無黃屋心今橫議若此據

朕本心惟應養母耳

此據秦檜奏疏所載上言

於是檜與參知政事

孫近言臣等比以金使及境各進愚計務欲接納適中

可以經久朝廷之體貴在慎密不敢漏言聞銓上章歷
詆蓋緣臣等識淺望輕無以取信於人伏望睿斷早賜
誅責以孚衆聽詔答曰卿等所陳初無過論朕志固定
擇其可行中外或致於憂疑道路未詳其本末至彼小
吏輕詆柄臣久將自明何罪之有至是乃議責銓檜批
旨曰北使及境朝廷夙夜講究務欲上下安帖貴得和
好久遠胡銓身為樞屬既有所見自合就使長建白乃
狂妄上書語言凶悖仍多散副本意在鼓衆劫持朝廷

可追毀出身以來文字除名勒停送昭州編管永不收
叙令臨安府差使臣兵級押發前去候到具月日聞奏
仍令學士院降詔布告中外深知朕安民和衆之意時
銓妾孕臨月遂寓湖上僧舍欲少遲行而臨安已遣人
械送貶所秘書省正字范如圭與勅令所刪定官方疇
見吏部侍郎晏敦復為銓求援敦復曰頃嘗言秦檜之
姦諸公不以為然今方專國便敢如此趙元鎮雖無狀
不至是也此人得君何所不為敦復即往見守臣徽猷

閣待制張澄語之曰銓論宰相天下共知祖宗朝言事官被謫開封府必不如是澄愧謝曰即追還矣

壬子左通直郎胡銓送吏部與廣南監當銓既竄斥秦檜孫近又奏銓所上封章言及臣等若重加竄斥於臣等分義有所不安欲望聖慈更加寬宥臺諫勾龍如淵李誼鄭剛中亦共救解之乃以銓監昭州鹽倉銓之行也監登聞鼓院陳剛中以啓送之曰屈膝請和知廟堂禦侮之無策張膽論事喜樞庭謀遠之有人身為南海

之行名若泰山之重又曰知無不言願請上方之劍不遇

故去聊乘下澤之車秦檜大恨之

此據銓自跋戒諭詔書及紹興正論參修


銓稱秦檜孫近鄭剛中李誼勾龍如淵夜半同上殿引救上稍霽威特免昭州之徙而日歷及他書皆不見臺

諫文字銓自記必審但謂如淵為給事中則誤耳正論云陳剛中任寺丞而銓所記以為鼓院二書不同考之日歷六年四月丙午左宣教郎陳剛中除太府寺丞替王師心成資闕而今太府寺題名皆無二人姓名蓋中間有旨待次者皆省罷故也鼓院題名起於紹興十六年亦無剛中姓名今且從銓所記俟考剛中紹興十年

八月壬申行遣

是月資政殿學士提舉臨安府洞霄宮陳與義薨於湖

州



次定四庫全書



建炎以來繫年要錄

四十五

建炎以來繫年要錄卷一百二十三

建炎以來繫年要錄卷一百二十三金人地名考證

達蘭

原書作達懶
誤改見卷一

烏凌阿

原書作烏陵
誤改見卷一

尼瑪哈

原書作粘罕
誤改見卷一

